



## JABATAN MUFTI NEGERI KEDAH DARUL AMAN IRSYAD AL-FATWA

### PERKARA: PANDUAN PENGGUNAAN PEMBESAR SUARA DI MASJID / SURAU YANG MENIMBULKAN KERESAHAN DALAM KALANGAN MASYARAKAT SETEMPAT

Mesyuarat Jawatankuasa Fatwa Negeri Kedah pada 27 November 2022 bersamaan 2 Jamadil Awal 1444 telah berbincang mengenai Panduan Penggunaan Pembesar Suara Di Masjid / Surau Yang Menimbulkan Keresahan Dalam Kalangan Masyarakat Setempat dalam Negeri Kedah dan bersetuju memberi pandangan seperti berikut;

1. Realiti masyarakat Islam di Malaysia khususnya di Negeri Kedah dalam penggunaan pembesar suara di masjid / surau bagi aktiviti azan untuk pemakluman masuk waktu solat. Manakala iqamah untuk memaklumkan waktu hendak mendirikan solat. Oleh itu, azan dan iqamah dibenarkan menggunakan pembesar suara (bahagian luar dan dalam) untuk memenuhi tujuan tersebut. Ini berdasarkan hadis Nabi ﷺ;

إِنِّي أَرَاكَ تُحِبُّ الْغَنَمَ وَالْبَادِيَةَ. فَإِذَا كُنْتَ فِي غَنَمِكَ وَبَادِيَتِكَ، فَأَذَّنْتَ بِالصَّلَاةِ، فَارْفَعْ صَوْتَكَ بِالنِّدَاءِ، فَإِنَّهُ لَا يَسْمَعُ مَدَى صَوْتِ الْمُؤَذِّنِ جِنَّ وَلَا إِنْسًا وَلَا شَيْءَ إِلَّا شَهِدَ لَهُ يَوْمَ الْقِيَامَةِ.

(رواية البخاري)

Maksudnya; *Sesungguhnya aku melihat kamu suka mengembala kambing dan berada dalam kawasan terpencil. Jika kamu mengembala kambingmu dan berada di kawasan kamu itu, maka kamu azan untuk solat. Angkatkan suaramu ketika melaungkannya, sesungguhnya tiada dengar sejauh suara muazzin itu samada oleh jin atau manusia atau sesuatu melainkan disaksikan akannya pada hari kiamat.*

2. Bagi aktiviti selain azan dan iqamah seperti *tarhim*, pemasangan rakaman bacaan al-quran sebelum masuk waktu solat, aktiviti kuliah, ceramah, forum, berzanji, qasidah dan seumpamanya, sekiranya majoriti anak kariah beragama Islam terutamanya yang tinggal berhampiran masjid / surau dan **tiada sebarang rungutan daripada penduduk sekitar terhadap penggunaan pembesar suara di bahagian dalam atau luar masjid, maka ia dibenarkan.**

